



Republika e Kosovës / Republika Kosova / Republic of Kosova
Komuna e Podujevës / Opština Podujevo / Municipality of Podujeva

KUVENDI I KOMUNËS

Procesverbal nga mbledhja e XXXIV-të (tridhjetekatër)-e rregullt, mandati VII-të, e mbajtur më 30 janar 2024.

Mbledhja filloi në orën 10:20 dhe u mbajt në sallën e mbledhjeve të Kuvendit të Komunës.

Mbledhjen e hapi dhe e kryesoi z.Hilmi Hoxha, Kryesues i Kuvendit.

Në fillimin e mbledhjes të pranishëm ishin anëtarët/et e Kuvendit të Komunës së Podujevës:

(Nga LDK Demokrat Hodolli; Arnisa Sylejmani; Arjeta Abazi; Edona Shabani; Adnan Zymeri; Arjant Topanica; Donjetë Sheqiri; Ilir Koprani; Qëndrim Softolli; Naim Çunaku; Ekrem Rrahmani; Tringa Sfishta; Fahri Hasani; kurse mungoi, Valon Demolli.

Nga LVV, Florent Hasani; Fitim Muçolli; Artrit Mulliqi; Kasib Bashota; Sebastina Vokri; Drita Pajaziti; Qëndresë Hajrizi; Ragip Fetahu; Xhevdet Maloku; Ardi Hasani; Haki Rudari; Bahri Blakçori; Lirika Maliqi.

Nga PDK, Bashkim Sylja; Mimoza Abdullahu; Endritë Murati.

Nga AAK, Mrika Thaçi; Burim Hasani; Arbnor Fazliu.

Nga OBKD, Gazmend Islami i cili mungoi me arsyetim shëndetësor me shkrim dërguar Kryesuesit të Kuvendit.

Gjithashtu të pranishëm mbledhje ishin drejtorët e Drejtorive të Komunës, dhe atë;

(Xhevie Beqiri-Drejtorja e Administratës DA; Avni Fetahu-Drejtorja e Arsimit DKA; Adelinë Stublla-Drejtorja e Shëndetësisë dhe Mirëqenies Sociale DSHMS; Leutrim Krasniqi-Drejtorja e Planifikimit Urban dhe Mbrojtjes së Mjedisit DPUMM; Saranda Stublla-Drejtorja e Pronës Kadastrit dhe Gjeodezisë DPKGJ; Pajtim Balaj-Drejtorja e Kulturës Rinisë dhe Sportit DKRS; Bahri Selimi-Drejtorja e Shërbimeve Publike Mbrojtjes dhe Shpëtimit DSHPMSh; Alban Zeka-Drejtorja e Inspeksionit DI; Vigan Salihu-Drejtorja e Planifikimit dhe Zhvillimit Ekonomik DPZHE).

Të pranishëm ishin edhe përfaqësues të KFOR, përfaqësues të OSBE, mediave lokale (TV Llapi) dhe disa zyrtar komunal.

Rendi i Ditës

z.Hilmi Hoxha, Kryesues i Kuvendit, e hapi mbledhjen duke i përshëndetur të pranishmit dhe duke i'u dëshiruar mirëseardhje dhe punë të mbarë në këtë mbledhje, theksoi, para se të fillojmë me mbledhjen, jeni në dijeni se në Komunën tonë ka ndodh një rast i rëndë me të riun Lulzim Fejzullahu, prandaj ju ftoj për një minutë heshtje.

U mbajt një minutë heshtje të riun Lulzim Fejzullahu.

Kryesues i Kuvendit, vazhdoi, kuorum kemi dhe mund të fillojmë me punime, për momentin prezent në sallë janë 31 anëtar/e të Kuvendit, kurse mungojnë 5 anëtar/e (*lexon emrat e atyre që për momentin mungojnë por që në vazhdim mund të vijnë dhe të evidentohen me nënshkrim në Listën përkatëse, dhe atë z.Valon Demolli, znj.Endritë Murati, znj.Mimoza Abdullahu, z.Gazmend Islami*). Mungesat tek ne janë bërë traditë, ka mungesa shumë, komunat tjera e praktikojnë për ata që mungojnë në mbledhje të Kuvendit duhet të bëjnë njoftimin dhe arsyen e mungesës, këtu jo që mungojnë në mbledhje po as edhe një e-mail nuk e shkruajnë për arsyen e mos pjesëmarrjes në

mbledhje, i vetmi është anëtar i Kuvendit z.Gazmend Islami i cili ka dërguar një e-maile përmes të cilëve na ka njoftuar se nuk është mirë me shëndet dhe ndodhet në Gjermani për trajtim shëndetësor, kurse për mungesën e të tjerëve nuk kemi arsytetime asnjëherë.

Paraprakisht kësaj mbledhje i ka parapri edhe mbledhja e Komitetit për Politikë dhe Financa – KPF ku është diskutuar dhe janë rekomanduar Kuvendit pikat për shqyrtim, Rekomandime të cilat ju janë përcjellë edhe juve. Para se të fillojmë me pikat e rendit të ditës, urdhëroni nëse ndokush dëshiron fjalën.

znj.Saranda Stublla, drejtoresh e DPKGJ, theksoi, ne si Drejtori kemi bërë përgatitjen e materialit për pikat për dhënie në shfrytëzim të pronave të pa luajtshme për gjithsej 6 parcela përfshirë edhe propozimet për formimet e komisioneve përkatëse vlerësuese, me kohë kemi bërë njoftimin publik për aplikimin e anëtarëve nga Organizatat e Shoqërisë Civile dhe deri dje ka qenë afati për aplikim, mirëpo pasi që kemi verifikuar nuk ka asnjë aplikant për këto aplikime për formimin e komisioneve, prandaj kërkoj që këto pika të rendit të ditës të shtyhen për një seancë tjetër.

z.Haki Rudari, theksoi, duke u bazuar në Ligjin për vetëqeverisjen lokale dhe Rregulloren e punës së Kuvendit të cilat mendoj se janë bazament i Kuvendeve komunale, unë propozoj një pikë tjetër të rendit të ditës krahas pikës së parë që është Plani i Punës së Kuvendit për vitin 2024, prandaj kam këtë; Propozim vendim për caktimin e orarit të mbajtjes së mbledhjeve të rregullta të Kuvendit të Komunës për vitin 2024. Këtë që unë po e them ka shumë Komuna që e kanë praktikë këtë, kjo në të kaluarën nuk ka ndodhë, andaj mendoj se është një gjë e mirë dhe serioze për arsye se një Kuvend Komunal me 35 këshilltarë është mirë që t'i përcakton seancat se kur do të mbahen. Ne 35 këshilltar/e të Kuvendit nëse votojmë atëherë pak a shumë e kemi edhe orarin e mbajtjes së seancave të Kuvendit. Po e lexoj nenin 88 paragrafi 1, pas miratimit të Planit të punës, Kuvendi e përcakton atë që unë e propozova, po e përsërisë Kuvendi e përcakton kalendarin e mbajtjes së mbledhjeve për vitin përkatës fiskal. Pra kemi të drejtë ligjore me Rregulloren dhe mendoj që është e mirë që krahas Planit të punës që kemi, dhe një komision të përfaqësuar nga subjektet e përfaqësuar në Kuvend e që nga ne Grupi i LVV-së ishte Profesor z.Fitim Muçolli, besoj që kjo pikë e rendit të ditës do të përkrahet. Në fund të fundit e imja si këshilltar është ta bëjë propozimin ndërsa e këshilltareve është të votoj për, kundër apo të abstenoj.

z.Naim Çunaku, theksoi, lidhur me dy propozimet që u ngritën këtu, së pari ishte propozimi i drejtoreshës së DPKGJ-së për shtyrjen për një mbledhje tjetër për vendimmarrje pikat e propozuara përkatëse që lidhen me dhënien e pronave në shfrytëzim, për çka më duhet ta shpreh mendimin tim që kur kemi marrë vendim në muajin dhjetor që asetet komunale gjegjësisht pronat komunale të mundësohet në përputhje me legjislacionin në fuqi, të krijohet mundësia që operatorët ekonomik të interesuar t'i marrin në shfrytëzim dhe arsytimi që ishte atëherë, është sot dhe do të jetë gjithë që të paktën do të duhej të jetë që ato prona, ato asete të fjetura të Komunës tonë të mos të mbeten të fjetura por t'i vëmë në funksion të zhvillimit ekonomik, ngritjes së mirëqenies dhe ta përmbushim një obligim ligjor që Komuna si parësore e ka kujdesin, avancimin e ruajtjes së pronave dhe ngritjes së vlerës së tyre në zhvillimet e tregut.

Jemi dëshmitarë që në vitin paraprak është marrë një vendim i tillë dhe ato prona përmes faqes zyrtare të Komunës kanë dalë për dhënie në shfrytëzim, por tani pyes a kemi pasë dhënie në shfrytëzim të atyre pronave, e që unë e di se prona kanë mbet vetëm si përmbushje e një formaliteti ose e një mundësie ligjore, po kurrë nuk kemi një raport se çka është bërë me ato prona, madje kemi shkuar aq larg, që po e them se ka filluar funksionimi i pushtetit lokal për herë të parë në vitin 2000 dhe sot e kësaj dite Komuna jonë nuk i ka të evidentuara të gjitha pronat e saj komunale dhe sot e asaj dite ne nuk e dimë ku janë ato prona, në çfarë gjendje janë, kush i shfrytëzon dhe me çfarë të drejte i shfrytëzon, por nuk po e zgjeroj debatin më shumë rreth kësaj.

Më bëri përshtypje fakti që asnjë Organizatë jo qeveritare, si obligim ligjor që duhet të jetë nga radhët e tyre një anëtar në komisionin përkatëse, por nëse nuk kemi anëtar të tillë me të drejtë drejtoresha e DPKGJ e potencoi që është kusht ligjor që të jetë edhe një anëtar nga OJQ-të, dhe kjo e bënë formalisht të pa përfunduar një diçka që vetëm mund të shtyhet sepse nuk ka zgjidhje tjetër. Ku dëshiroj ta vë akcentin, kur kemi ndarë subvencione, gjegjësisht kur është bërë publikimi për subvencionet për OJQ, ne të gjithë jemi dëshmitarë që jo pak Organizata jo qeveritare ju kemi ndarë subvencione për veprim brenda territorit të Komunës, andaj a do të thotë kjo që i'u kemi ndarë subvencione dikujt që nuk ka gatishmërinë të vëhet në proces të mbarëvajtjes të ndonjë procedure ligjore komunale, del që po, ose të kundërtën kemi rënduar aq shumë raportet ne si institucion me OJQ që ata nuk kanë gatishmëri të jenë pjesë e vendimmarrjes ashtu siç e thotë ligji, kjo vërtetë na bën shqetësuese, apo të paktën duhet të jemi të shqetësuar që po mbeten sërish ato prona pa u vë në funksionin e tyre parësor për çka kemi vendos në këtë Kuvend në muajin dhjetor. Pra nuk kemi rrugë tjetër e nderuar drejtoreshë e DPKGJ, mund ta votojmë ose jo këtë, ne mund të marrim një vendim por derisa OJQ nuk nominonjë anëtarët e tyre për anëtar në Komisione, do të thotë është diçka që nuk po funksionon, andaj mund të marrim vendim që t'i shtyjme këto propozime për një datë tjetër. Do të doja që në datën tjetër, jo vetëm këto prona por të gjitha ato prona që i kemi, dhe ndoshta është mirë që ky Kuvend të ndalet dhe ta trajtoj si pikë të veçantë dhe të krijoj kushte që ta bëjmë atraktive për operatorët ekonomik për marrjen e atyre pronave në shfrytëzim. E zgjata paksa shumë dhe përë këtë kërkoj falje i nderuar Kryesues sepse me të vërtetë është një fakt shqetësues kjo ngase janë numër një, kur e them këtë jeni në dijeni kur është ndërtuar objekti përkatës në Orllan që e kemi shpallë dhe e dini vlerën që është investuar në atë objekt - një pjesë donacion dhe një pjesë nga buxheti dhe taksat e këtyre qytetarëve. Është objekt në vlerë mbi 1,000,000.00€ dhe ta lësh atë objekt në mëshirën e fatit me një potencial me vlerë të tregut 1,000,000.00€ më tepër se 15 vite pa vë në funksion, veç pa përgjegjësi mund t'i themi, jo diçka tjetër, dhe kur e them këtë e them pa dashur ta zgjasë gishtin dhe adresën se kush është fajtor për gjendjen kur dihet se pozita ka përgjegjësinë për atë që është mandatuar.

Lidhur me pyetjen tjetër që e bëri kolegu im i nderuar shefi i Grupit të këshilltarëve të LVV-së z.Haki Rudari, më bëri përshtypje propozimi i tij, me të vërtetë një propozim me vend, mirëpo ne pikë të parë të rendit të ditës e dini që e kemi Planin e punës së Kuvendit dhe këto që zotëri Rudari i potencoi që të merret vendim ndaras për caktimin e orareve dhe ato data është dashur të jenë në atë Plan. Vërtetë po e them edhe njëherë, nuk mund ta quaj atë si Plan sepse ai vetëm emrin plan mund ta ketë nëse nuk ndërthehen në vete datat se kur mbahen seancat. Nuk dëshiroj t'ju marrë kohë me Rregulloren e punës së Kuvendit sepse Rregullorja dhe Ligji e parashohin atë kohën rrëshqitëse se sa ditë mund të rrëshqasin / lëvizin, pra flitet vetëm për seriozitetin e punës tonë, kështu që mendoj zotëri Rudari që nuk është dashur të marrim vendim sot për caktimin e orareve sepse në këtë formë qysh jemi këtu nuk e kemi të lehtë të gjejmë ujdë ngase është dashur që ato data të jenë në Plan të punës dhe kur bisedojmë për këtë e që e kemi pikën e parë të rendit të ditës aty besoj se duhet ta marrim një vendim që ai Plan i punës mos të votohet, të kthehet dhe të përpunohet dhe të vijë i kompletuar siç i ka hije një Kuvendi komunal dhe siç bëhet gjithandej Kosovës si dhe aty të zënë vend edhe datat për të cilat ne përcaktohem se kur do të mbahen mbledhjet e Kuvendit.

z.Bashkim Sylja, theksoi, sa i përket propozimit të drejtoreshës së DPKGJ edhe unë pajtohem që në muajt e ardhshëm është mirë të na sjellët një raport lidhur me pronat që janë dhënë në shfrytëzim në vitin 2023, më duket shumë e pasinqertë nga ana e Shoqërisë civile kur e dimë se mijëra euro janë subvencionuar në vitin e kaluar prej kësaj qeverisje dhe të mos dërgojnë asnjë propozim në komisionet përkatëse.

Sa i përket pikës së propozuar nga shefi i Grupit të LVV-së, mendoj se do ishte mirë të caktohet datat e mbledhjeve në Planin e punës dhe ky propozim të mos ketë nevojë të hyj fare si pikë e rendit të ditës por në Plan të punës ka mund të caktohet data për secilin muaj kur me u mbajt seancat, kështu që kjo temë është problematike përveç nëse marrim pauzë për t'i caktuar ato data, si do që të jetë unë jam për.

z.Haki Rudari, theksoi, falënderoj parafolësin shefin e Grupit të PDK-së, kurse sa i përket shefit të Grupit të LDK-së mendoj që në një farë forme nuk qëndron ajo që e tha për arsye se Plani i punës së Kuvendit dhe orari i mbajtjes së mbledhjeve dhe takimeve janë të ndryshme.

Ne e kemi Planin e punës dhe i kemi informatat nëpër muaj, por neve fare nuk na pengon pastaj në pikën e dytë t'i caktojmë datat e mbajtjes së seancave. Unë si propozues gjithherë kam thënë që është mirë që të respektohet Rregullorja për arsye se për propozimet arsyetimin e bën këshilltari dhe nuk hapet debat. Çfarë do propozimi që e bënë LDK-ja mua fare nuk më pengon, e arsyeton e hedh në propozim votohet dhe kalon ose jo unë fare nuk e kam problem, të njëjtin propozim e kam edhe unë. Kryesuesi i Kuvendit e zgjati paksa dhe ju la hapësirë për arsye sepse fillimisht propozimi i drejtoreshës së DPKGJ është dashur të vëhet në votim dhe ato të mbeten për seancën e radhës, pastaj është dashur propozimi im të vëhet në votim dhe nëse kalon në rregull dhe nëse jo unë nuk jam person që "kukati, pesë para s'i jap", unë e mbaj qëndrimin tim dhe e respektoj qëndrimin e këshilltarëve tjerë, madje edhe në opozitë kur kam qenë kurrë nuk e kam thënë pse e ke bërë ose pse e ke votuar atë, është e drejtë e këshilltarit të voton sipas bindjeve të veta.

Kryesuesi i Kuvendit në bazë të Rregullores, pasi të arsyetohet e hedh në votim dhe kur të vije pika e rendit të ditës mund të hapet debat pastaj, atëherë hapet debati nga këshilltar të ndryshëm dhe unë si iniciues apo propozues pastaj kam propozime tjera kur vijmë te kjo pikë që tani në këtë kohë nuk mund t'i jap, por kur të vijmë te kjo pikë, nëse kalon është fjala, unë kam propozime tjera dhe atëherë hapet debati.

Për fund, është mirë propozimi të hidhet në votim, qoftë ai i drejtoreshës së DPKGJ për largim të pikave dhe shtyrje për një prej seancave të radhës, dhe propozimi im që ishte për futjen e një pike të re të rendit të ditës, të cilën e lexova më herët.

Kryesuesi i Kuvendit, theksoi, asnjë pikë nuk hyn në rend të ditës pa u debatuar për të fillimisht, t'i e propozon kurse të tjerët flasin dhe debatohet atëherë ne e vejmë në votim atë propozim, askush nuk e mohoj që ti (i drejtohet z.Haki Rudarit) nuk ke të drejtë të propozosh pika të rendit të ditës dhe t'i vësh në votim, ne i hedhim propozimet në votim. Ne e kemi të paraparë që çdo muaj ta mbajmë nga një mbledhje normale, mirëpo data e caktimit të mbledhjeve është një problem në qoftë se e caktojmë një datë dhe e kemi mundësinë me lëvizë atë datë çfarë do të thotë ai caktim i asaj date, e rëndësishme është që çdo muaj ta mbajmë nga një mbledhje, kështu që a e caktojmë ne datën e mbajtjes së mbledhjes më 15 apo 20 të muajit shembull, e them këtë ngase kemi disa mbledhje të jashtëzakonshme dhe solemne që na e prishin rendin, andaj për mua data nuk luan rol, mirëpo ne mund të caktojmë data por nuk e di a do mund t'iu përmbahemi atyre datave.

z.Naim Çunaku, theksoi, mos të mendojmë të krijojmë dilema që me cungimin e debatit arrihet, të njëjtën Rregullore e kemi të gjithë përpara vetës dhe varësisht kush dhe çka kupton prej saj dhe si dëshiron ta interpretoj. Faktikisht ashtu thuhet që nuk hapet debat për propozimet, por nuk mund t'ia cungosh Grupeve që e përbëjnë Kuvendin e Komunës të thërrasin prej foltores dhe të orientojnë Grupin që i takojnë si duhet të veprojnë, andaj nuk ishte kurrfarë debati por ishte orientim në këtë rast për Grupin e LDK-së nga ana ime, pra që t'i orientojë për votim.

Faleminderit shefit të Grupit të LVV-së z.Haki Rudari për sugjerimin, gjegjësisht njoftimin që orari dhe plani kanë ndryshim, vërtetë këtë send nuk e kam ditë dhe e falënderoj për diçka që më bëri ta kuptoj sot, por nuk di çka ka më themelore te një Plan i punës se sa caktimi edhe i datave të

seancave, dhe kjo ishte poenta ime, ne tani mund ta ndajmë edhe muajin e korrikut dhe ta nxjerrim një vendim tjetër sikurse që mundemi edhe për muajin shtator, por cili është ai plan i cili nuk përmban në vete edhe aspektin kohor se kur do të realizohet, gjegjësisht dinamikën e realizimit të atij plani. Kurrfarë tendence nuk pata, vetëm e kamë këtë që po e potencoj edhe njëherë, nëse sot e hapim si pikë të rendit të ditës dhe mendojmë që në këtë përbërje kaq të gjerë të caktojmë data, ne do zgjasim disa seanca dhe nuk do të mund t'i caktojmë ato data. Në një formë datat e seancave përcaktohen karshi dinamikës së zhvillimit të punëve edhe të Ekzekutivit se kur ne duhet t'i mbajmë ata përgjegjës dhe të njoftojmë opinionin publik për ngjarjet për çka jemi të thirrur, këtu ishte poenta sepse mendoj dhe propozimi im ishte t'i kthehet atij komisioni ai plan i punës, të pasurohet ai plan edhe me data sepse ai komision është një grupim më i vogël dhe mund të caktojë data, kurse ne 35 këshilltar dyshoj shumë se do arrijmë të dakordohemi për data.

z.Haki Rudari, theksoi, vetëm më lejoni edhe njëherë të lexoj nenin dhe nuk ka kurrfarë problemi, neni 37 paragrafi 1, po e citoj, për propozimet lidhur me ndryshimin apo plotësimin e rendit të ditës nuk hapet debat, kjo është në Rregullore, nuk po e thotë Haki Rudari por po thotë Rregullorja, por pas arsytimit të shkurtra të propozuesit dhe sqarimet e Kryesuesit të Kuvendit kalohet në votim, do të thotë votimi është ai që e përmbyll.

Sa i përket çështjes tjetër, janë dy gjëra të kundërta edhe me Rregullore njëherë kemi të bëjmë me planin e punës pastaj orarin e mbajtjes së takimeve, se a respektohet ai orar dhe ajo datë nuk është në domenin e këshilltarit pastaj, janë organet tjera, janë Drejtoritë dhe Ekzekutivi që do të japin informata në bazë të të cilave pastaj thirren seancat.

z.Ekrem Rrahmani, theksoi, për propozimin e shefit të Grupit të këshilltarëve të LVV-së z.Haki Rudari në formë të pyetjes i drejtohem sepse e di që e kanë pas një anëtar në komisionin përkatës për hartimin e Planit të punës por si duket nuk është konsultuar fare me të, pastaj ka mundur edhe të marrë pjesë në dëgjim publik dhe ta bëjë propozimin në fjalë, por jo tani të bëjë propozim si pikë të rendit të ditës sepse nuk ka nevojë të bëhet pikë e re e rendit të ditës.

Kryesuesi i Kuvendit, theksoi, i nderuari këshilltar z.Haki Rudari, Plani i punës së Kuvendit nuk është plan vetëm i imi, por është i komisionit që është formuar prej të gjitha partive politike, andaj më duket se u teprua kjo çështje paksa, askujt më nuk do t'i jepet fjala për arsye se të gjithë keni pas përfaqësuesin tuaj në komision dhe keni mund të konsultoheni nga të gjitha subjektet politike.

z.Haki Rudari, theksoi, e kam obligim t'i përgjigjem kolegut z.Ekrem Rrahmani sepse kërkoi t'i përgjigjem, ne e kemi pas një përfaqësues në komisionin përkatës, shumë të nderuar dhe të respektuar, ne kemi mbledhjet e rregullta të Grupit, mirëpo kjo që e thash unë fare nuk ka të bëjë me atë që ne kemi pas përfaqësues në Komision. Tani ne po kërkojmë orarin e mbajtjes së takimeve, asgjë tjetër, kurse sa keni qenë aktiv si komision për hartimin e planit të Punës unë pajtohem me propozimin që e keni sjellë.

Tani unë po kërkoj caktimin e orarit të mbajtjes së takimeve, fundja kjo është një çështje shumë teknike në kuptimin e vet për arsye se ne kemi të drejtë të propozojmë, propozimi jonë hedhet në votim dhe kurrfarë problemi nuk ka, kurse pse LDK-ja 20 vite nuk ka kaluar, i kemi edhe ne 2 vite që se kemi kaluar këtë, edhe ne që 2 vite ende nuk kemi caktuar datat e mbajtjes së seancave dhe jemi krejt në rregull.

z.Naim Çunaku, theksoi, u bë një konstatim i pa qëndrueshëm, edhe unë edhe zotëri Rudari dhe shumë prej jush këtu kemi pas Plan të punës dhe publikisht e thërras zotëri Rudarin nëse gjen një plan të punës të miratuar nga ky Kuvend edhe në kohën e LDK-së por edhe tani, që nuk përmban datat, unë i kërkoj falje publikisht, nëse nuk e gjen duhet të paktën nga ana njerëzore të kërkoj falje për një konstatim që e bëri e që nuk qëndron.

Nuk ka plan pune pa data të mbajtjes së seancave dhe nuk ka pasë asnjëherë.

Kryesuesi i Kuvendit, theksoi, rreth kësaj pike të rendit të ditës më nuk kemi çka diskutojmë, andaj së pari e vë në votim propozimin e Drejtoreshës së DPKGJ-së për tërheqjen nga rendi i ditës për këtë mbledhje dhe shtyrjen për një mbledhje të radhës së Kuvendit propozimet e renditura në rendin e ditës (pikat 2 deri në 7), për shkak të mos interesimit të përfaqësuesve nga sektori joqeveritar lokal për të qenë pjesë e komisioneve në fjalë, dhe atë:

Pas votimit, Kryesuesi i Kuvendit konstatoi se Njësëri me 31 vota Për, nga anëtarët sa ishin prezent në sallë, mbështet kërkesa / propozimi i drejtoreshës së DPKGJ për tërheqjen nga rendi i ditës për këtë mbledhje dhe shtyrjen për një mbledhje të radhës së Kuvendit propozimet si në vijim, për shkak të mos interesimit të përfaqësuesve nga sektori joqeveritar lokal për të qenë pjesë e komisioneve në fjalë, dhe atë:

2. Propozim Vendimi për miratim paraprak për dhënien në shfrytëzim afatshkurtër të pronës së paluajtshme të Komunës – Objekti afarist në Zonën Kadastrale Orllan.
-Propozim Vendimi për formimin e komisionit vlerësues për zbatimin e procedurave për dhënie në shfrytëzim sipas këtij propozim vendimi.
3. Propozim Vendimi për miratim paraprak për dhënien në shfrytëzim afatshkurtër të pronës së paluajtshme të Komunës – Njësia kadastrale P-00494-0, Zona Kadastrale Lupç i Poshtëm.
-Propozim Vendimi për formimin e komisionit vlerësues për zbatimin e procedurave për dhënie në shfrytëzim sipas këtij propozim vendimi.
4. Propozim Vendimi për miratim paraprak për dhënien në shfrytëzim afatshkurtër të pronës së paluajtshme të Komunës - Njësia kadastrale P-00495-4, Zona Kadastrale Lupç i Poshtëm.
-Propozim Vendimi për formimin e komisionit vlerësues për zbatimin e procedurave për dhënie në shfrytëzim sipas këtij propozim vendimi.
5. Propozim Vendimi për miratim paraprak për dhënien në shfrytëzim afatshkurtër të pronës së paluajtshme të Komunës - Njësia kadastrale P-00594-0, Zona Kadastrale Turuçicë.
-Propozim Vendimi për formimin e komisionit vlerësues për zbatimin e procedurave për dhënie në shfrytëzim sipas këtij propozim vendimi.
6. Propozim Vendimi për miratim paraprak për dhënien në shfrytëzim afatshkurtër të pronës së paluajtshme të Komunës - Njësia kadastrale P-00596-0, Zona Kadastrale Turuçicë.
-Propozim Vendimi për formimin e komisionit vlerësues për zbatimin e procedurave për dhënie në shfrytëzim sipas këtij propozim vendimi.
7. Propozim Vendimi për miratim paraprak për dhënien në shfrytëzim afatshkurtër të pronës së paluajtshme të Komunës - Njësia kadastrale P-00597-0, Zona Kadastrale Turuçicë.
-Propozim Vendimi për formimin e komisionit vlerësues për zbatimin e procedurave për dhënie në shfrytëzim sipas këtij propozim vendimi.

Kryesuesi i Kuvendit, theksoi, tani kalojmë te propozimi i z.Haki Rudarit, paraprakisht ju them se unë kam punuar kohë të gjatë në arsim dhe ka goxha kohë që planin e punës e kemi bërë për një vit, por me kurrikul tani është veç për dy muaj sepse planin e punës nuk mund ta realizosh, pra shembull, nuk i ke shpjeguar në shtator por i ke shpjeguar në janar, dhe tani në qoftë se ti nuk e kryen Planin e punës në shtator dhe tetor atë e vazhdon në muajin nëntor.

Kështu që si parim orari i mbledhjeve është brenda çdo muaji, kështu që përcaktimi i një date nuk më arsyeton mua se si duhet t'i përmbahemi asaj date, kështu që ndoshta kemi telashe dhe do të dalin tema që do t'i diskutojmë pse nuk i'u kemi përmbajt datave të caktuara.

Të gjithë përfaqësuesit e gjitha partive keni qenë pjesë e komisionit përkatës atëherë pse nuk i keni obliguar anëtarët e juaj të japin këtë propozim, keni mundur t'ju thoni anëtarëve tuaj propozoni datat, edhe z.Haki Rudari është dashur të komunikoj përmes përfaqësuesit të partisë së tij z.Fitim Muçolli, pastaj z.Naim Çunaku përmes z.Ekrem Rrahmanit e kështu me radhë, prandaj pa humbur

kohë më shumë për këtë çështje, unë e vë në votim propozimin e z.Haki Rudarit për përfshirje në kuadër të rendit të ditës për këtë mbledhje edhe pika Caktimi i orarit të mbledhjeve të Kuvendit të Komunës së Podujevës për vitin 2024.

Pas votimit, Kryesuesi i Kuvendit konstatoi se me 15 vota Për, asnjë votë Kundër dhe asnjë votë të Përmbajtur (të tjerët nuk votuan) mbështetet propozimi i z.Haki Rudarit për përfshirje në kuadër të rendit të ditës për këtë mbledhje edhe pika:

- Caktimi i orarit të mbledhjeve të Kuvendit të Komunës së Podujevës për vitin 2024

z.Naim Çunaku, theksoi, i nderuari Kryesues i Kuvendit, je duke e zhvilluar një praktikë në kundërshtim me ligjin, ta kam tërheq vërejtjen njëherë dhe sërish po të them që ne jemi kursyer që mos t'i apelojmë vendimet e këtij Kuvendi, por i nderuar Kryesues konsultojë ligjin, konsultojë Ministrinë e Administrimit të Pushtetit Lokal. Nuk ka kalim të një vendimi nëse për një vendimmarrje nuk janë 18 vota, këtë e kam me ty zotëri Kryesues sepse me z.Haki Rudarin nuk desha të polemizoj. Nuk thuhet prezent, por që marrin pjesë në votim, kështu e thotë ligji, është duke praktikohet ky standard, dijeni që është një standard në kundërshtim me ligjin.

Kryesuesi i Kuvendit, theksoi, këtu në ligj thuhet, të pranishëm dhe votojnë.

z.Naim Çunaku, theksoi, zotëri Kryesues, kjo do të thotë për çdo vendimmarrje, që kanë marrë pjesë në vendimmarrje 18 vota, qofshin ata për, qofshin kundër, qofshin të abstenuar, mirëpo mos pjesëmarrja në votim nuk nënkupton as prezencë dhe nuk mund të kualifikohet.

Vazhdojeni ju asgjë të keqe s'kemi, por është një praktikë dhe një standard që je duke e zhvilluar në kundërshtim me ligjin. Nuk kemi dashur të apelojmë në Ministrinë e Administrimit të Pushtetit Lokal këtë vendimmarrje që është kah ndodh në këtë Kuvend Komunal të Podujevës.

Kryesuesi i Kuvendit, theksoi, në Ligj thuhet, shumica që janë prezent dhe që votojnë, këtu votuan 15 këshilltar.

z.Naim Çunaku, theksoi, kur ti u zgjodhe Kryesues i Kuvendit a ishim ne prezent këtu po, a kemi marrë pjesë në votim jo, dhe nuk mund të zgjedhesh deri sa nuk i ke 18 vota në kuti, qofshin ato vota për, kundër apo abstenim, 18 duhet të jenë pjesëmarrës në vendimmarrje.

Kryesuesi i Kuvendit, theksoi, ligji nuk e specifikon numrin e anëtarëve që duhet të marrin pjesë në votim.

z.Naim Çunaku, theksoi, i nderuar Kryesues, me keqardhje e them se nuk është ky shpjegim siç e cekët, nuk e shpjegon numrin sepse Kuvendet komunale nuk janë të përbëra prej numrit të njëjtë të anëtarëve dhe nuk mund të thotë kaq e aq numra sepse diku kemi Kuvend komunal me 25 këshilltar, diku tjetër me 31 këshilltar, pastaj me 35 - 41 dhe 51 këshilltar, për këtë arsye nuk është përcaktuar numri.

z.Ragip Fetahu, theksoi, të respektuar të pranishëm, atë që e thotë z.Naim Çunaku është shumë e thjeshtë, kjo kaloi tashmë këtu dhe kemi praktika që edhe në të kaluarën kemi kaluar vendime në këtë formë, në qoftë se kjo është në kundërshtim me ligjin atëherë zotëri Çunaku ka të drejtë të dërgoj në Ministrinë përkatëse opinionin e tij dhe ai opinion të na kthehet e ta shohim se ai opinion a është i ligjshëm a jo.

z.Naim Çunaku, theksoi, zotëri Ragip Fetahu, unë e potencova që ka raste e raste, por është krijuar si standard dhe ne nuk kemi dashtë të merremi me diçka formale dhe në Ministri, nëse ata nuk i përkushtohen kësaj është problem i tyre dhe neve asgjë nuk na prish punë kjo.

Nëse atakohemi drejtpërdrejtë dhe atakohet një interes më i madh qytetarë, ne do ta bëjmë por kjo tregon që edhe ata nëse nuk reagojnë ose po dëshirojnë t'i mbyllin sytë ose nuk janë në nivel detyre.

Kryesuesi i Kuvendit, theksoi, kurrfarë vendimi nuk është marrë lidhur me këtë që po diskutojmë, këtu vetëm u vendos që të hyjë si pikë e rendit të ditës edhe ajo pikë. Po e citoj nenin 48 paragrafi 2 të Ligjit për vetëqeverisjen lokale, ku thuhet, nëse ndryshe nuk parashihet shprehimisht në këtë ligj, vendimet e Kuvendit të Komunës aprovohen me shumicën e anëtarëve që janë të pranishëm dhe votojnë. Pra këtu ceket,shumicës prej atyre që votojnë, ju nuk keni votuar as kundër e as nuk keni abstenuar, nuk keni marrë pjesë në votim.

z.Naim Çunaku, theksoi, meqë filluam ta trajtojmë këtë temë në gjysmë të mandatit pasi që gjysma e mandatit veç ka shkuar, dhe unë e potencova se është krijuar standard kjo, mirëpo kur i referohemi bazës ligjore nuk mund t'i referohemi pjesërisht por duhet t'i referohemi ashtu siç shkruan. Të gjithë i kemi disa letra që i mbajmë me vete, e them këtë sepse u lexua një dispozitë e Ligjit për vetëqeverisjes lokale e që besoj se i njëjti ligj është edhe ky që po e citoj unë, pra atë që e thash unë, për mendimin tim thuhet edhe në këtë Ligj sepse atë e kam marrë nga ligji, kurse ju e cituat nenin 48 paragrafi 2 të Ligjit për vetëqeverisjen lokale ku thuhet, nëse ndryshe nuk parashihet shprehimisht në këtë ligj vendimet e Kuvendit të Komunës aprovohen me shumicën e anëtarëve që janë të pranishëm dhe votojnë, mirëpo çka thotë ky Ligji për abstenimet,abstenimet regjistrohen me qëllim të themelimit të kuorumit por nuk merren parasysh në rezultatet e votimit, prandaj unë nuk di çka me qenë më i qartë këtu.

Kryesuesi i Kuvendit, theksoi, kjo pikë veç po hyn në rend të ditës, pastaj diskutojmë dhe e shqyrtojmë kur t'i vie radha. Këtu thuhettë pranishmit që votojnë, pra të pranishëm këta që votojnë, si të voton shumica kalon, por shumica e atyre që votojnë, ju nuk morët pjesë në votim, madje as unë, por kuorumin e keni bërë.

z.Naim Çunaku, theksoi, mendoj se u teprua ky debat, mirëpo dalloje kuorumin e mbajtjes së seancës prej kuorumit të vendimmarrjes sepse ato janë dy gjëra të ndryshme, vazhdoje ashtu sikurse deri më tani, kurse ne po themi që të mos krijohet si standard, përndryshe nuk është kushedi çfarë pike kjo, si hyni ose jo në rend të ditës.

Kryesuesi i Kuvendit, theksoi, kemi dy propozime që kaluan për rend të ditës, propozimi i drejtoreshës së DPKGJ që të hiqen pikat e cekura nga rendi i ditës dhe propozimi i z.Haki Rudarit për përfshirje të një pike në rend të ditës, prandaj pa humbur kohë më shumë e vë në votim rendin e ditës me pikat si vijon;

1. Propozim Plani i punës së Kuvendit të Komunës së Podujevës për vitin 2024
2. Propozim vendim për përcaktimin e kompensimit të anëtarëve të Komisionit komunal të aksionarëve të Ndërmarrjes Publike-Kompania Regjionale e Mbeturinave KRM "Pastrimi" sh.a
3. Caktimi i orarit të mbledhjeve të Kuvendit të Komunës së Podujevës për vitin 2024
4. Të Ndryshme

Pas votimit Kryesuesi i Kuvendit konstatoi se me 28 vota Për, asnjë votë Kundër dhe asnjë votë të Përmbajtur (të tjerët nuk votuan), miratohet rendi i ditës për këtë mbledhje, me pikat si vijon:

1. Propozim Plani i punës së Kuvendit të Komunës së Podujevës për vitin 2024
2. Propozim vendim për përcaktimin e kompensimit të anëtarëve të Komisionit komunal të aksionarëve të Ndërmarrjes Publike-Kompania Regjionale e Mbeturinave KRM "Pastrimi" sh.a
3. Caktimi i orarit të mbledhjeve të Kuvendit të Komunës së Podujevës për vitin 2024
4. Të Ndryshme

1. Propozim Plani i punës së Kuvendit të Komunës së Podujevës për vitin 2024

z.Hilmi Hoxha, Kryesues i Kuvendit, e paraqiti propozim Planin në fjalë, theksoi, dihet që të gjitha procedurat i ka kaluar plani i punës, duke filluar së pari nga ky Kuvend që është formuar komisioni prej të gjitha subjekteve politike, është mbajtur diskutimi publik më datë 09 janar 2024 dhe po ashtu është diskutuar disa herë nga anëtarët e komisionit dhe në fund komisioni përkatës ka vendosur që plani i punës të paraqitet për shqyrtim në Kuvend.

Kryesisht jemi orientuar që të gjitha Drejtoritë të përfshihen në planin e punës për të dhënë informata dy herë në vit, pastaj edhe Kryetari i Komunës, Auditori, dhe ato pika që i kanë propozuar drejtorët e Drejtorive që parashihet brenda këtij viti t'i procedojnë në Kuvend, mirëpo ne e dimë që shumë herë na dalin pika të reja, kërkesa të reja qoftë nga Ministrinë apo nga Drejtoritë e Komunës kështu që nuk ka mundësi që të gjitha të përfshihen.

Për orarin e mbledhjeve që u diskutua këtu afërsisht 1 orë, ne mbledhjet i mbajmë brenda çdo muaji kurse sa i përket datave të mbledhjeve besoj që ashtu sikurse mua edhe juve të gjithëve që jemi 35 anëtar/e të Kuvendit nuk do të na pëlqej ndonjë datë, e them këtë sepse po te pyesësh secilin prej nesh ka propozime tjera, kështu që është mirë të veprohet ashtu siç kemi vepruar ku mbledhjet kryesisht janë mbajtur në fund të muajit përkatës. Vlen të theksohet se në vitin e kaluar i kemi mbajtur të gjitha mbledhjet, pra nuk e kemi humbur asnjë mbledhje me përjashtim të muajit gusht kur ka qenë pushim. Përndryshe nëse duhet dhe e vlerësoni se duhet të caktohen data e mbledhjeve mund t'i caktojmë, por unë nuk po besoj që do të kemi mundësi t'iu përmbahemi.

Materialin e draft Planit të punës e kemi marrë në qoftë se keni ndonjë vërejtje por besoj se këtu s'ka çka të diskutohet sepse përfaqësuesit i kemi pas të gjithë në Komision dhe i kanë dhënë mendimet dhe sugjerimet e tyre, andaj pa humbur kohë, urdhëroni e hapi debatin.

z.Ekrem Rrahmani, theksoi, unë edhe herën e kaluar kam votuar kundër për anëtar të komisionit dhe e kam ditë se nuk mund të bëjnë asgjë dhe për këtë ka dal ashtu siç kam thënë. Këtu në plan të punës për vitin 2024 janë përfshirë 42 pika, mund t'i them fotokopje e planit për vitin 2023 e që prej 42 pikave 22 prej tyre as nuk janë përmend kurrë as nuk kanë dal kurrë dhe po i cekë ato që s'janë mbajtur kurrë, e ato janë; plani i prokurimit për vitin 2024 nuk ka ardh asnjëherë në Kuvend, Informatë e DSHPMSHP jo dy herë në vit por asnjëherë e që e kemi listuar këtu në muajin shkurt, në muajin mars i kanë cek 6 pika me u mbajtur prej tyre 3 s'janë mbajtur kurrë, informatë nga DPUMM asnjëherë s'ka pas informatë nga kjo Drejtori as për vitin 2022 e as në vitin 2023, besoj se ashtu vazhdon përsëri, pastaj informatë nga DKRS asnjëherë s'ka pas asnjë informatë, informatë nga DI asnjëherë, mandej informatë për gjendjen e ambientit në Komunën e Podujevës asnjëherë s'ka pas, informatë nga DA s'ka pas asnjëherë, në muajin maj nga DSHMS ka pas informatë njëherë në vitin 2023, e jo dy herë siç ceket tani për vitin 2024, a do të ketë informatë se di, informatë DPKGJ asnjëherë s'ka pas.

Raporti i performancës për vitin 2023 nuk është mbajtur asnjëherë as për vitin 2022, e as për vitin 2021, raporti i punës së komisioneve të themeluara nga Kuvendi i Komunës së Podujevës për vitin 2023 asnjëherë raport të tillë para Kuvendit s'kemi pas. Raporti 6 mujor i Kryetarit të Komunës ky e ka dhënë raportin një vjetor e jo atë 6 mujor, do të thotë njëri raport mungon, informatë nga drejtori i DBF-së s'ka, prapë e kemi informatën e DKRS-së në muajin nëntor dy herë në vit as kjo s'ka ndodh kurrë, as nga DBPZHR kurrë, prapë DI në muajin nëntor s'ka sjellë informatë. Raporti financiar në muajin tetor për janar-shtator as që ka ardh ndokush në Kuvend për të dhënë raport dhe as që është dhënë arsyeja e mos dhënies së këtyre raporteve kur dihet se në bazë të ligjit të financave këto raporte janë të obligueshme por s'ka ndodh as kjo. Informatë nga DSHPMSH e paraparë në muajin dhjetor as kjo s'ka ardh në vitin 2023 dhe nuk do të ndodh, informatë e

DPZHE as ky drejtor kurrë s'ka dhënë informatë edhe pse e ka obligim dy herë në vit, informatë nga DPUMM në muajin dhjetor as kjo informatë s'ka ardh dhe ky drejtor i kësaj Drejtorie s'ka dhënë kurrë një informatë të tillë, informata nga DA as kjo s'ka ndodh.

Nëse ne e bëjmë një plan sa për sy e faqe ose me i gënjye qytetarët ose ne me gënjye njëri tjetrin me ngritë dorën këtu me votu e pastaj me thënë se kemi me iu përmbajte këtyre pikave që janë 42 e nuk përmbahen 22 prej tyre, vazhdojeni. Këtu duhet me iu përmbajt pikave të planit të punës pastaj mos të vijne drejtorët për të dhënë informatë këtu, ne kërkojmë përgjegjësi prej tyre pse nuk vijne, por jo ju t'i pyesni ata a t'jua vëni pikën e rendit të ditës apo jo, përfshijeni pikë në rend të ditës e mos të vijne ata, pastaj ne do dalim e të ulemi aty në vend të tyre.

z.Adnan Zymeri, theksoi, sa i përket procedurave të përpilimit të planit të punës t'i (i drejtohet Kryesuesit të Kuvendit) e ceke shumë mirë më herët që secili subjekt politik i ka pasë përfaqësuesit në atë komision, mirëpo detyra e këshilltarit të Kuvendit nuk mund të cunohet veç me propozimet e dhëna prej propozuesve të partive politike në komisionin përkatës, por e kemi të drejtën të japim propozime dhe të plotësojmë planin e punës për kundër asaj që po thua ti i keni dërguar përfaqësuesit dhe tash ne të mos japim propozimet tona, andaj nuk po e konsideroj që është e drejtë. Ajo që e ceku kolegu im më herët z.Ekrem Rrahmani pajtohem plotësisht për shkak se realizueshmëria e planit të punës në vitin e kaluar ka qenë shumë e ulët, por edhe përkundër kësaj unë po e konsideroj shumë të rëndësishme që duke marrë parasysh zhvillimet e fundit që kanë ndodhur në Komunën e Podujevës në aspektin e sigurisë, vrasjet tronditëse që kanë qenë dhe që na e kanë ul reputacionin edhe si Komunë në nivel nacional, Kuvendi mos të jetë vëzhgues i këtyre aktiviteteve por të marrë rolin e vet, shembull çka kanë bërë komunat tjera në këtë drejtim është se kemi raste kur njëra prej komunave e ka vendos në muajin mars shqyrtimin e raportit të informatës për aktivitetet të KKS-së, ne e dimë që ai Këshill është instrumenti i vetëm në komunë që merret me sigurinë në Komunën e Podujevës, andaj konsideroj që Kuvendi është shumë e rëndësishme ta ketë një raport prej KKS-së kur do që ne e vendosim.

Tema tjetër që është mirë të vendoset në plan të punës është edhe një informatë mbi sigurinë në Komunën e Podujevës, do të thotë këto tema i propozoj që të jenë pjesë e planit të punës, besimin e kam shumë të vogël që do të diskutohet për to qysh nuk është diskutuar për shumë tema që i ceku kolegu im z.Ekrem Rrahmani, por të paktën ky është propozimi im dhe ju ftoj ta votoni.

z.Haki Rudari, theksoi, pajtohem tërësisht me diskutimin e kolegut z.Adnan Zymeri nga radhët e LDK-së, pavarësisht që ne kemi pas përfaqësuesit në atë komision, përfaqësuesi i LVV-së nuk e din ndoshta çka unë propozoj ose ai tjetri apo përfaqësuesit e subjekteve tjera, seriozisht pajtohem që secili këshilltar edhe tani ka të drejtën të bëjë propozime. Pse ne mund të bëjmë një propozim siç e bërë kolegu z.Adnan Zymeri nuk paraqet kurrfarë problemi dhe nuk e qesim në pozitë të keqe komisionin që ka qenë sepse kemi të drejtë t'i japim disa propozime dhe sot miratohet plani i punës dhe pastaj vazhdojmë tutje.

Personalisht i kam dy propozime krahas kësaj që ka ardhë plani i punës prej komisionit, së pari kam një propozim që raporti nga Kuvendi i Komunës për vitin 2023 të hyjë si pikë e rendit të ditës në muajin shkurt, është e drejtë e imja të bëjë propozime, kurrfarë vërejtje s'kam te komisioni që se ka propozuar sepse është qëndrim dhe bindje e imja, si dhe po ashtu kam bërë një propozim në plan të punës për muajin shkurt ta kemi një raport nga Komitetet e themeluar nga Kuvendi i Komunës së Podujevës siç janë Komiteti për Politikë dhe Financa si dhe Komiteti për Komunitete. Këto dy çështje propozoj që të hyjnë në plan të punës dhe atë muajin shkurt dhe besoj se vijne si pika të rendit të ditës dhe kurrfarë problemi s'ka.

Do të thotë do të thotë komisioni e ka kryer punën e vet dhe e ka sjellë planin në Kuvend kurse tani ne e kemi ende të drejtën për të bërë propozime, miratohet plani i punës dhe vazhdojmë tutje.

znj.Saranda Stublla, theksoi, vetëm një sqarim shtesë për asamblistin z.Ekrem Rrahmani, DPKGJ e ka mbajtur informatën bazuar në planin e punës në muajin e përcaktuar.

z.Ekrem Rrahmani, duke i'u përgjigjur parafolësës, theksoi, këtu në plan të Punës së Kuvendit shkruan dy herë në vit Drejtoria me dhënë informatë, ndoshta e tejkalova që thash asnjëherë dhe kërkoj falje, por e di që drejtoresha e DSHMS-së ka dhënë njëherë raport, po ashtu drejtori i DKA-së edhe pse unë hiç fort në qejf se kam, por raportet i ka dhënë e që ndoshta se përmenda dhe po i hy në hak, prandaj po e përmendi se raportet i ka dhënë, ndërsa drejtorët tjerë asnjëherë s'kanë dhënë asnjë informatë. Pra ju drejtoresh e DPKGJ e keni pas obligim dy herë në vit të jepni informata kurse keni jep vetëm një informatë, por edhe njëherë ju kërkoj falje që paraprakisht e potencova se nuk keni dhënë informatë fare.

Unë mendoj se drejtorët e Drejtorive duhet me qenë më të përgjegjshëm, nuk e di pse hezitojnë me dhënë informata dhe të tregojnë punët e tyre çfarë kanë bërë dhe çfarë jo, ndoshta edhe do t'i bënin pak reklamë vetit duke treguar për punët e tyre që i kanë kryer, pastaj ne i'u tregojmë a është ashtu apo jo, po lëvdohen pak më shumë apo jo. Pra duhet të respektohet Kuvendi i Komunës, të jepen informatat për qytetarët mendoj se kjo është legjitime dhe duhet të ndodhë andaj nuk e di përse iket nga kjo punë.

z.Arjant Topanica, theksoi, desha të ndërlihem shkurt me atë që u potencua disa herë se kemi qenë të gjitha subjektet pjesë e hartimit të planit të punës, nuk është e vërtetë që kemi qenë të gjithë anëtarët e subjekteve politike pjesë e hartimit të planit të punës së Kuvendit për arsye se qëndrimi jonë ka qenë që nuk do jemi pjesë e një plani të cilin po e shohim që vit pas viti nuk po zbatohet, madje as në përqindjen më të ulët të tij dhe kështu nuk e kemi parë të arsyeshme të jemi pjesë e një komisioni që harton një plan i cili nuk po zbatohet dhe nuk po merret seriozisht.

Është për të ardhur keq qasja që i bëhet akterëve që duhet të jenë pjesë e mbikëqyrjes së hartimit dhe zbatimit të planit të punës kurse ky plan nuk po zbatohet, andaj për këtë arsye desha ta korrektoj këtë sepse nuk kemi qenë pjesë e hartimit të një plani të punës dhe shpresojmë dhe duam të besojmë se nga ky vit do të merret më seriozisht ky plan dhe si i tillë të zbatohet në përpikëri për arsye se jemi të thirrur që t'ju qëndrojmë qytetarëve mbrapa, megjithatë për çka është i thirrur dhe çka jemi të thirrur ne si asamblist dhe ky Kuvend që t'ju dal në mbrojtje interesave të tyre kur ka për çka të jepet përgjegjësia.

Kryesuesi i Kuvendit, theksoi, i nderuari z.Arjant Topanica, ti ke pranuar këtu në Kuvend që të zgjedhesh dhe je zgjedhë anëtar i komisionit me vota, pra të kanë votuar, a është kështu.

Pastaj të kemi thirr në komision dhe nuk ke ardhë njëherë, ke thënë jo në këtë kohë, ta kemi ndërruar edhe orarin më vonë por në fund ke thënë s'do të jem pjesë e këtij komisioni, kështu ka qenë rrjedha. Pse nuk janë kryer informatat në vitin e kaluar ne ato informata i kemi këtë vit.

Ne jemi për t'i realizuar dhe për me ardhë drejtorët për të dhënë informatat në Kuvend dhe për këtë arsye i kemi si pika të rendit të ditës në plan të punës. Ju po thoni s'janë mbajtur vitin e kaluar, mirëpo ndoshta këtë vit do të mbahen dhe do të insistojmë për këtë, normale me shpresë jetojmë.

z.Arjant Topanica, theksoi, secili i ka punët e veta dhe nuk mundemi ne të vazhdojmë duke i shtyrë prej një viti në vitin tjetër për arsye sepse informata e vitit 2023 nuk është e njëjtë si informata e vitit 2024 sepse kemi të bëjmë për periudha të ndryshme. Sa serioz ka filluar të zbatohet ky plan e kemi edhe raportin e janarit që as janari tash që po fillojmë nuk i ka pikat që i ka parapa ky plan i punës në mbledhjen e parë të tij, mirëpo shpresojmë se e keqja kur do dhe ku do që ndalet dhe përmirësohet është e mirë, kështu që shpresojmë se nga ky vit të zbatohet ky plan për shkak të mos seriozitetit, andaj të merret më seriozisht.

z.Naim Çunaku, theksoi, plani i punës i një Kuvendi në këtë rast i Kuvendit tonë komunal në rastin më të mirë nga ajo që e pashë dhe lexova, nga ajo që kemi pas edhe vitet e kaluara, me keqardhje është një refleksion i gjendjes së këtij Kuvendi, e them këtë sepse në këtë plan të punës që në rend të parë ish dashtë t’iu vë në spikamë anëtarëve të Kuvendit që të jemi në misionin që na përcaktohet në përfaqësim, në monitorim të ekzekutivit gjegjësisht në thirrje të llogaridhënies së Ekzekutivit karshi Kuvendit në vendimmarrje.

Kemi raste e që nuk po dua kësaj radhe t’i përmend që aq larg ka shkuar Ekzekutivi ku në një formë e numëron veten si diçka mbi Kuvendin dhe harron t’i lexoj dy shkronja ku thuhet organi më i lartë i Komunës është Kuvendi i Komunës, dhe ashtu siç e ceka edhe në mbledhjen e KPF-së po e cekë edhe tani se për vendimet e Kuvendit të Komunës disa pjesëtar të Ekzekutivit po i japim vetës të drejtë t’i “pleçojnë” ato, ndërsa po harrojnë se ata janë aty për t’i zbatuar vendimet e Kuvendit, kurse “pleçninë” e bën Kuvendi edhe duhet t’i përmbahen asaj.

Çka shohë të mangët në këtë raport është prej ditës kur është propozuar themelimi i komisionit, unë jam njëri prej atyre që kam qenë kundër dhe kam votuar kundër tij sepse që në start është përzier, është bërë një komision miks Ekzekutiv – Kuvend, e që mënoj se nuk ka diçka më shkelje flagrante se sa që atë i cili do të të jap llogari, ta ofrosh për të bërë plan e që ai duhet me të dhënë llogari, kjo ka qenë që e kam kundërshtuar.

Nga plani i vitit të kaluar kemi një avancim, pra nuk e them që po shihet vetëm zi, por dua të shohë edhe diçka bardh që ka ndodh dhe është për herë të parë që ka ndodh që ky plan ka dal në diskutim publik, mirëpo por se çfarë ka qenë ai diskutim publik do të duhej t’i bashkëngjitet raporti nga diskutimi publik sepse në fakt i dimë çfarë diskutime publike kemi dhe madje është goxha për keqardhje të thirrëmi në diskutim publik, ndërsa ne si anëtar të Kuvendit të mos kemi raport nga diskutimi publik. Para se të bëjmë një plan të ri, u fol që është dashur ta kemi raportin se sa është realizuar plani paraprak, sa kemi qenë ne në nivel të detyrës sipas planit të hartuar për vitin 2023 e që nuk e kemi pasë, andaj kështu siç ka ardh ky plan e tha dhe kolegu z.Ekrem Rrahmani dhe s’dua ta përsërisë, mirëpo kjo që po na ngjanë është vetëm një përmbushje formale e një ane juridike, por përmbajtje këtu diçka nuk ka, me vetë faktin që sot na u krijuan dilemat dhe na u shtuan minutat shtesë që do të na merr kohë (po paragjykoj ndoshta nuk është siç po them unë) dhe nuk do t’i afrohem caktimit të datave se kur do të mbahen mbledhjet e Kuvendit.

Dëgjova që u cekë nga dikush se ajo nuk është as Bibël e as Kuran dhe mund të ndryshoj sepse çdo këshilltar e ka të drejtën të propozoj pika qoftë për të shtuar apo për të hequr, mirëpo plani është ai se ku e shohim vetën ne në fund të vitit 2024 dhe si mendojmë ta luajmë rolin tonë si Kuvend. Diçka përmbajtje në këtë nuk ka, me vetë faktin se edhe datat janë të mangëta, nuk dëshiroj të them diçka tjetër, vetëm atë që duam ta bëjmë që mos të jemi pjesë e një vendimmarrje për një plan i cili për të mos qesharak po e them se as për së afërmi nuk i përmbush kriteret të jetë një plan ose udhërrëfyes i Kuvendit të Komunës së Podujevës.

Kryesuesi i Kuvendit, theksoi, nëse nuk ka propozime tjera atëherë ne duhet të shkojmë në votim, mirëpo ftoj z.Adnan Zymerin t’i paraqes edhe njëherë sakt propozimet e bëra për përfshirje në kuadër të planit të punës së Kuvendit për vitin 2024.

z.Adnan Zymeri, theksoi, propozimi i parë është, shqyrtimi i raportit / informatës për aktivitetet e KKSB-së, që i njëjti të vendoset në muajin mars, ndërsa propozimi i dytë ishte, informatë mbi sigurinë në Komunën e Podujevës, që e njëjta të na jepet nga Policia e Kosovës dhe atë në muajin nëntor ose kur do që e shihni më të përshtatshme, për mua nuk paraqet ndonjë problem kurdo që vendos Kuvendi sepse e rëndësishme është përmbajtja, propozimi im konkret ishte që kjo informatë të vije në muajin nëntor.

Kryesuesi i Kuvendit, theksoi, tani i vë në votim propozimet e anëtarit të Kuvendit z.Adnan Zymeri, dhe atë:

-Shqyrtimi i raportit / Informatës së KKSB - (në muajin Mars)

-Informatë mbi sigurinë në Komunën e Podujevës, nga Policia e Kosovës - (në muajin Nëntor)

Njëzëri me 32 vota Për, nga anëtarët sa ishin prezent në sallë, mbështeten propozimet që në kuadër të Planit të Punës së Kuvendit për vitin 2024 të përfshihen edhe pikat e propozuara nga anëtari i Kuvendit z.Adnan Zymeri, dhe atë:

-Shqyrtimi i raportit / Informatës së KKSB - (në muajin Mars)

-Informatë mbi sigurinë në Komunën e Podujevës, nga Policia e Kosovës - (në muajin Nëntor)

Kryesuesi i Kuvendit, theksoi, po ashtu anëtari i Kuvendit z.Haki Rudari e pati një propozim që ishte sjellja e Raportit të punës së Kuvendit për vitin 2023, dhe atë në muajin shkurt, andaj edhe këtë propozim e vë në votim.

Me 31 vota Për, asnjë votë Kundër, asnjë votë e Përmbajtur, (1 anëtar nuk votoi), mbështetet propozimi që në kuadër të Planit të Punës së Kuvendit për vitin 2024 të përfshihet edhe pika e propozuar nga anëtari i Kuvendit z.Haki Rudari, dhe atë:

-Raporti i punës së Kuvendit të Komunës për vitin 2023 - (në muajin Shkurt)

Kryesuesi i Kuvendit, theksoi, tani e vë në votim propozim planin e punës së kuvendit për vitin 2024 sipas materialit përkatës, përfshirë edhe plotësim ndryshmet e bëra sipas propozimeve të cekura më lartë.

Pas votimit, Kryesuesi i Kuvendit konstatoi se me 29 Vota Për, asnjë votë Kundër, asnjë votë e Përmbajtur (të tjerët nuk votuan), miratohet Plani i Punës së Kuvendit të Komunës për vitin 2024, sipas propozimit përkatës dërguar me thirrjen e kësaj mbledhje si dhe duke përfshirë edhe pikat e propozuara dhe mbështetura paraprakisht, si në vijim;

-Raporti i punës së Kuvendit të Komunës për vitin 2023 - (në muajin Shkurt)

-Shqyrtimi i raportit / Informatës së KKSB - (në muajin Mars)

-Informatë mbi sigurinë në Komunën e Podujevës, nga Policia e Kosovës - (në muajin Nëntor)

2. Propozim vendim për përcaktimin e kompensimit të anëtarëve të Komisionit komunal të aksionarëve të Ndërmarrjes Publike-Kompania Regjionale e Mbeturinave KRM “Pastrimi” sh.a

Kryesuesi i Kuvendit, theksoi, për këtë pikë të rendit të ditës ju rikujtoj se anëtarët e këtij bordi / komisioni nuk kanë drejtë të jenë pjesë e mbledhjes sepse mund të jetë konflikt interesi.

z.Qëndrim Softolli, theksoi, në emër të Grupit të LDK-së, ne propozojmë që të paguhet të gjithë aksionarët e të gjitha ndërmarrjeve publike lokale, dhe të mos ketë ndasi sepse është e pa drejtë, prandaj nëse hyjnë në kuadër të kompensimit të gjithë aksionarët e të gjitha ndërmarrjeve, atëherë e përkrahim, ndryshe jo.

z.Florent Hasani, theksoi, në emër të Grupit të LVV-së e mbështesim këtë propozim ashtu siç është paraqitur si pikë të rendit të ditës.

z.Ekrem Rrahmani, theksoi, neve Grupit të LDK-së nuk na bie të votojmë i nderuar Kryesues ngase në qoftë se e mban mend në këtë Kuvend kur janë propozuar anëtarët e komisioneve të aksionarëve, goxha moti është më 28 shkurt 2022, ne i kemi dhënë propozimet tona mirëpo na keni thënë se ju nuk bënë të jepni propozim sepse jeni në opozitë dhe ne i kemi numrat ju s'bën me qenë aksionar, andaj tani jemi kundër.

z.Bahri Selimi, drejtor i DSHPMSH, theksoi, KRM "Pastrimi" është Kompani Regjionale ku përbëhet prej 7 komunave dhe në kuadër të kësaj të gjitha komunat kanë nxjerrë një vendim të tillë për pagesë të aksionarëve që do të bëhet nga buxheti i Ndërmarrjes dhe këtë ta kemi të qartë sepse nuk preket buxheti i Komunës dhe se aksionarët nuk paguhen në asnjë Ndërmarrje Publike nga Komuna, por paguhen nga Ndërmarrja nëse veç ka mundësi buxhetori për t'i paguar këta aksionar. Tani bordi i Ndërmarrjes në fjalë ka marrë një vendim për t'i paguar këta aksionar dhe në fakt edhe në Ndërmarrje ka qenë një diskrepancë mes këtyre pagesave sepse e vetmja ka qenë Komuna e Podujevës / aksionarët e Komunës së Podujevës që nuk janë paguar ngase për të gjithë aksionarët e komunave tjera që janë 6 komuna tjera paguhen, dhe meqë kjo është një vendim i Ndërmarrjes dhe paguhet prej buxhetit të Ndërmarrjes nuk e di a ka mundësi që ne të nxjerrim vendim për t'i paguar gjithë aksionarët e Ndërmarrjeve pa pëlqimin e atyre Ndërmarrjeve.

Tani ne e dimë që në Komunën tonë kemi Ndërmarrje Publike "Stacioni i Autobusëve", dhe Ndërmarrjen Banesore e cila po thuajse është inekzistente për shkak të numrit të punësuarve.

Mendoj se Kuvendi nuk ka mundësi dhe të drejtë të nxjerrë vendim për pagesën e aksionarëve meqë duhet paraprakisht pëlqimi i Ndërmarrjes sepse buxheti është i Ndërmarrjes jo i Komunës.

Në këtë rast unë edhe njëherë ju sqaroj se 6 komunat tjera që janë aksionare në "Pastrimi" e kanë nxjerrë një vendim të tillë, është vetëm Komuna e Podujevës që nuk e ka nxjerrë dhe tani Ndërmarrja në fjalë i ka propozuar dhe kërkuar Kryetarit të Komunës që të nxjerrë një vendim i tillë në mënyrë që në një formë të bëhet një lloj barazimi me të gjitha Komunat tjera aksionare, dhe në këtë aspekt Kryetari i Komunës është obliguar të propozoj në Kuvendin e Komunës që të nxirret vendim dhe atë vetëm për anëtarët e komisionit që janë nga Kuvendi, tani kushdo qofshin ata. Këto janë procedurat dhe kërkohet nga ne të nxjerrim vendim me të cilin Komuna lejon pagesën e aksionarëve që do të bëhet nga Ndërmarrja "Pastrimi" dhe buxheti i Ndërmarrjes e cila paraprakisht ka marrë vendim për këtë çështje dhe vetëm pret vendimet e komunave.

Tani nuk e shoh krejt në rregull që të votohet ose jo për pagesë të gjithë aksionarëve të të gjitha Ndërmarrjeve publike Lokale që janë të caktuar prej Kuvendit sepse për anëtarin nga radhët e Ekzekutivit vendos Kryetari i Komunës se a dëshiron apo jo, kurse për anëtarët e zgjedhur nga përbërja e Kuvendi vendos vet Kuvendi i Komunës, prandaj kjo është në pika të shkurtra procedura e kësaj çështje. Ndërmarrja në fjalë na janë drejtuar edhe me shkrim dhe i kemi e-mailat përkatëse ku kanë kërkuar një gjë të tillë e që pastaj edhe Kryetari i Komunës ka qenë në një far forme i obliguar ta paraqes në Kuvend këtë çështje.

Përndryshe kur të funksionalizohen dhe të fuqizohen ekonomikisht Ndërmarrjet tona tjera lokale, atëherë sigurisht gjithsecila do të nxjerrë një propozim për t'i paguar aksionarët e vet përveç anëtarëve të bordit që është obligim për t'i paguar.

z.Ekrem Rrahmani, theksoi, i nderuar drejtor i DSHPMSH, e di që Kompania në fjalë i paguan sepse e kam lexuar materialin dhe është arsytimi aty, paga minimale e një punëtori që e merr pagën më të vogël në Ndërmarrje, paguhen aksionarët, mirëpo në komunat tjera si ajo e Prishtinës ka ndodh që Kryetari e ka marrë vendimin, jo Kuvendi, madje unë nuk e kuptoj përse edhe u ardhë këtu ky propozim. Në Prishtinë me vendim të Kryetarit kanë vazhduar me i paguar aksionarët kompanive, atje janë Ndërmarrje më të mëdha dhe kanë buxhetin ndryshe dhe paguhen në të gjitha

Ndërmarrjet, diku rreth 350 € sa është paga minimale e një punëtori, mirëpo përse neve na është sjell ky propozim në Kuvend nuk arrita ta kuptoj, nëse e din pak më gjerësisht na e thoni.

z.Bahri Selimi, drejtor i DSHPMSH, theksoi, ndoshta mbeta borxh për këtë, mirëpo unë e potencova edhe më parë që vendimin për të emëruarit nga Ekzekutivi e merr Kryetari i Komunës ndërsa për asamblistët vendimin e merr Kuvendi dhe kjo ka ndodh i nderuar zotëri Rrahmani në 6 komunitat tjera, unë i kam në e-mail që mi kanë dërguar këtu vendime të tillë të ngjashëm të Komunës së Lipjanit dhe Komunës së Obiliqit të cilat i kanë nxjerrë kohë më parë në vitin 2022. Për anëtarët e emëruar nga Kuvendi nuk mund të marrë vendim Kryetari, për këta anëtar merr vendim Kuvendi i Komunës dhe i propozohet kompanisë, por në këtë rast me propozim të kompanisë siç e thash më herët.

z.Ekrem Rrahmani, theksoi, nëse merret ky vendim sot, pagesa a do të bëhet retroaktive prej datës kur janë emëruar në shkurt të vitit 2022, apo do të paguhen prej kohës së hyrjes në fuqi të këtij vendimi.

z.Bahri Selimi, drejtor i DSHPMSH, përgjigje parafolësit, theksoi, kërkesa është për pagesë retroaktive mirëpo vetëm për vitin 2023, jo për 2022, pastaj vazhdon me pagesën e tyre ashtu siç siç e kanë edhe komunitat tjera.

z.Bashkim Sylja, theksoi, është e vërtetë se pagesa bëhet prej Ndërmarrjes publike mirëpo të gjithë ne e dimë që këtë Ndërmarrje në vitin e kaluar e kemi subvencionuar si Kuvend dhe në njëfarë forme kjo i bie që mjetet e qytetarëve janë nga buxheti i Komunës sonë dhe normalisht ajo ka edhe të hyra që inkason nga puna e saj, prandaj mendoj se do ishte mirë që kjo çështje të rregullohej edhe për bordet / komisionet tjera e jo vetëm për një bord të aksionarëve sepse po diskriminohen tjerët, siç është Ndërmarrja “Stacioni i Autobusëve” i cili ka 7 muaj dhe asnjë cent nuk e kanë marrë, kështu që nuk po më duket në rregull një kompanie ose një bord të aksionarëve me t’i bëhet pagesa ndërsa aksionarëve dhe bordeve tjera jo.

Do të ishte mirë që të paktën në seancën e ardhshme të gjendet baza ligjore dhe të rregullohet kjo çështje edhe për aksionarët e ndërmarrjeve tjera.

z.Bahri Selimi, drejtor i DSHPMSH, theksoi, nuk e di sa u dëgjua me vëmendje dhe ndoshta në këtë sallë jemi keqkuptuar paksa apo nuk kam qenë mjaftueshëm i qartë, por unë e thash që në fillim se një propozim vendim të tillë e bënë/ekzekuton Ndërmarrja, jo Komuna sepse nuk paguhen prej buxhetit të Komunës. Pra Komuna nuk mundet pa propozim të Ndërmarrjes të thotë paguaj komisionin e aksionarëve, komisione të cilat nuk paguhen në asnjë Ndërmarrje publike tjetër prej Komunës, por prej Ndërmarrjes. Tani sa është Ndërmarrja e fuqishme dhe ka buxhet t’i paguaj aksionarët përveç Bordit të drejtorëve që është obligative i nderuar Bashkim Sylja, ndërsa për aksionarët merr vendim Ndërmarrja, nuk mund të merr vendim Komuna.

Stacioni i Autobusëve në momentin që të forcohet dhe të bëhet e zojna e vetit në njëfarë forme, ajo mund të nxjerrë vendim të tillë, aksionarët janë ata që e udhëheqin Bordin e secilës Ndërmarrje dhe ata mund të angazhojnë Bordin për marrjen e një vendimi të tillë.

z.Bashkim Sylja, theksoi, plotësisht pajtohem me drejtorin parafolës z.Bahri Selimi, mirëpo ne të gjithë e dimë në çfarë gjendje është Stacioni i Autobusëve dhe çfarë gjendje ka qenë kur e kemi marrë ne, do të thotë nuk kanë pas mundësi as pagesat për punëtor të kryhen e lëre më të formojë Bord, por në këtë Kuvend keni sjellë dhe e kemi subvencionuar atë me shuma 10,000.00€ e 20,000.00€, do të thotë me u marrë një vendim prej Qeverisë dhe Ekzekutivit për t’u subvencionuar Stacioni i Autobusëve, pra ta kenë një buxhet të paktën anëtarët e Bordit të Drejtorëve, nuk po them për aksionarët por për anëtarët e Bordit sepse ata e kanë sjellë gjendjen deri në këtë pikë. Tani paguhen me rregull të gjithë punëtorët, pra dua të them në njëfarë formë që puna e tyre të kompensohet, thjeshtë.

Kryesuesi i Kuvendit, theksoi, mendoj se është mirë që për ata aksionarët e kompanive tjera komunale të bëhet një zgjidhje, por për këtë mbledhje nuk jemi të përgatitur sepse normalisht që duhet të bëhen propozim vendimet për mënyrën e pagesës së tyre e që për t'i paguar duhet të ketë buxhet ose duhet subvencionuar kompaninë dhe përmes atyre mjeteve t'i marrin pagesat aksionarët. Tani edhe unë e mbështes që për aksionarët e kompanive të bëhet një zgjidhje sepse punën e kryejnë njëjtë, prandaj është mirë që në një mbledhje të ardhshme ta marrim një vendim sepse sot nuk jemi të përgatitur për marrjen e një vendimi të tillë, pra mendimi im është që këtë çështje ta lëmë për një mbledhje të ardhshme, të diskutojmë me Drejtoritë dhe Kryetarin e Komunës, pastaj të sillim propozim vendimi në Kuvend edhe për pagesën e aksionarëve tjerë dhe bordeve tjera. Kështu që për këtë kompani nuk kemi më çfarë të diskutojmë edhe pse të drejtën e fjalës nuk mund t'ia mohojmë askujt, andaj urdhëroni nëse ndokush dëshiron fjalën.

Pra ky ishte vetëm një mendim i imi, përndryshe propozimin e z.Qëndrim Softolli mund ta vëmë në votim, por nuk jemi të përgatitur për atë çështje.

z.Qëndrim Softolli, theksoi, kam një pyetje dhe kërkoj sqarim sa i përket asaj që ceku drejtori parafolës z.Bahri Selimi, nëse kompania ka caktuar kompensimin e aksionarëve atëherë përse ne po marrim vendim për buxhetin e dikujt tjetër, nëse veç nuk është në kompetencën e Kuvendit të Komunës, këtë nuk e kam të qartë a ka apo jo bazë ligjore ky propozim vendim.

z.Bahri Selimi, drejtor i DSHPMSh, theksoi, vendimi që merr Kuvendi i Komunës është për t'i paguar asamblistët që janë trupë e komisionit në fjalë të cilët janë të angazhuar në atë Ndërmarrje e cila ka kërkuar një vendim se a dëshiron Komuna që edhe ata të jenë pjesë e asaj pagese, pra ata e kanë kërkuar një gjë të tillë. Secila komunë aksionare e kësaj kompanie e ka dërguar një vendim të tillë për asamblistët e vet që janë pjesë e komisionit. Pra në një formë ne po marrim vendim për t'i paguar asamblistët tanë të cilët pastaj mund të jenë pjesë e pagesës që kompania i paguajnë.

Unë edhe njëherë po e them, për ndërmarrjet tjera ne mund të marrim vendim vetëm nëse i paguajmë me paratë tona e që për këtë s'ka mundësi ligjore, nuk është e drejtë e rregulluar kjo çështje, mirëpo në rastin në fjalë ne po marrim vendim për 2 assembleistët që janë anëtarët të komisionit të aksionarëve për t'juar lejuar pagesën Komuna e Podujevës krahas anëtarëve tjerë të komunave tjera pjesëmarrëse në Ndërmarrjen përkatëse të cilët paguhen.

z.Haki Rudari, theksoi, duke dëgjuar diskutimin e gjithë kolegëve dhe drejtorit parafolës, ne kemi një propozim vendim për caktimin e kompensimit të një ndërmarrje, po në të njëjtën kohë edhe unë pajtohem dhe nuk është mirë të bëjmë pagesa selektive për arsye se duhet gjetur mënyrat që edhe për anëtarët e tjerë të komisioneve të bëhen pagesat. Në seancën e radhës duhet gjetur mënyrën, duhet të vij siç ka ardh ky propozim vendim tani, duhet të gjendet ana ligjore dhe të vij propozim vendimi për të tjerët që janë të përfaqësuar në ndërmarrjet tjera si "Eko Llapi", "Kosova Trans", "Ndërmarrja Banësore", e të tjera nëse ka, pra po e përfundoj, duhet gjetur ana ligjore edhe për të tjerët në seancën e radhës dhe besoj se do e marrim vendimin që edhe ata të paguhen konform ligjit dhe rregullores.

z.Bashkim Sylja, theksoi, është mirë që ky propozim vendim që është sjellë në Kuvend të përkrahet sepse komunat tjera normalisht e kanë përfunduar këtë procedurë, andaj përse të mbeten vetëm dy anëtarët e Komunës tonë pa e gëzuar këtë të drejtë. Kjo bëhet si praktikë në të ardhmen kur të formohen komisionet dhe e dimë që kanë përgjegjësi dhe subvencionohen për punën që e bëjnë, kështu që është mirë të kryhet kjo punë.

z.Arjant Toponica, theksoi, unë sërish kërkoj një sqarim sepse nuk e di a jemi shumë të qartë, do të thotë ne të marrim vendim që kompania me pasë të drejtë t'i paguaj dy aksionarët e Kuvendit të komunës së Podujevës.

z.Bahri Selimi, drejtor i DSHPMSSH, theksoi, ne duhet që kompanisë t’ia japim një lloj pëlqimi që ajo të mund ta bëjë pagesën.

z.Arjant Topanica, theksoi, nëse ata meqenëse janë pjesë e saj përse nuk mundet kompania t’i paguaj me buxhetin e saj pa na pyetur neve si Kuvend, unë s’po e kuptoj këtë.

z.Bahri Selimi, drejtor i DSHPMSSH, theksoi, kompania përkatëse e kanë kërkuar si dëshmi që këta janë aksionar pra le të dihen me emra dhe mbiemra se kush janë aksionarë atje.

z.Arjant Topanica, theksoi, edhe njëherë pyes, pasi që është buxheti i tyre përse të pyetemi ne për këtë pagesë. Kush janë aksionarët ne e kemi dërguar listën kur janë votuar dhe ata e dinë se kush janë, pra qysh tani kërkojnë ta dinë se kush janë ata aksionarë, unë nuk e di a ka bazë ligjore.

Dhe atëherë kur janë votuar aksionarët ne nuk jemi pyetur fare si Grup, por jemi anashkaluar andaj ju takon juve që ta merrni një vendim të tillë për ata aksionarë që i keni dërguar në atë ndërmarrje.

Kryesuesi i Kuvendit, theksoi, besoj se diskutimi për këtë pikë të rendit të ditës përfundoj, prandaj e hedhë në votim propozim vendimin që t’iu lejohet kompensimi anëtarëve të Komisionit komunal të aksionarëve të Ndërmarrjes Publike-Kompania Regjionale e Mbeturinave KRM “Pastrimi” sh.a, sipas propozimit përkatës të dërguar me thirrjen e kësaj mbledhje.

Pas votimit, Kryesuesi i Kuvendit konstatoi se me 18 vota Për, asnjë votë Kundër dhe asnjë votë e Përmbajtur (të tjerët nuk votuan) miratohet Propozim vendimi për lejimin e kompensimit të anëtarëve të Komisionit komunal të aksionarëve të Ndërmarrjes Publike-Kompania Regjionale e Mbeturinave KRM “Pastrimi” sh.a, sipas propozimit përkatës të dërguar me thirrjen e kësaj mbledhje.

3. Caktimi i orarit të mbledhjeve të Kuvendit të Komunës së Podujevës për vitin 2024

z.Haki Rudari, në cilësinë e propozuesit të kësaj pike, theksoi, erdhëm te një pikë e cila ndoshta u zgjatë e stërgjatë shumë e që për mua nuk ka problem sepse gjithkush e ka të drejtën e diskutimit.

Të nderuar koleg, duke u bazuar në Ligjin për vetëqeverisjen lokale dhe në Rregulloren e Punës së Kuvendit, nenet 87 dhe 88 propozoj; caktimin e orarit të mbajtjes së seancave të Kuvendit të Komunës së Podujevës dhe atë që mbledhjet të mbahen si vijon; në muajin shkurt më 29.02.2024, në muajin mars më 28.03.2024, në muajin muaji prill më 30.04.2024, në muajin maj më 31.05.2024, në muajin qershor më 27.06.2024, në muaji korrik më 30.07.2024, muaji gusht te jetë muaj i pushimeve, pastaj në muajin shtator mbledhje të jetë më 02.09.2024, në muaji tetor më 01.10.2024, në muaji nëntor më 26.11.2024, dhe në muaji dhjetor më 27.12.2024, ndërsa Mbledhjet e KPF-së të mbahen rregullisht para mbledhjeve të Kuvendit,

Po ashtu krahas kësaj që unë e lexova, askush nuk e cenon të drejtën e thirrjes së mbledhjeve solemne që në këtë rast e kemi datën 17 shkurt për Ditën e Pavarësisë së Kosovës, 5 maji Dita e Dëshmorëve, Ditën e Çlirimit të Komunës dhe ditët tjera.

Unë i kam rekomanduar vetëm mbledhjet e rregullta të Kuvendit, prandaj po besoj që është një propozim i mirë, por në fund të fundit këshilltari e ka të drejtën e vet të votimit.

Mbledhjet e solemne le të jenë pjesë e këtij propozimi të cilat i ceka më lartë.

Kryesuesi i Kuvendit, theksoi, a ka ndonjë propozim lidhur me këto data të prezantuara nga z.Haki Rudari. Këto data të mbledhjeve që i propozoj parafolësi prapë mund të jenë 7 ditë më herët ose më vonë, pra ka një mundësi të tillë, mirëpo nëse ndokush dëshiron ta marrë fjalën për ndonjë propozim për ndryshimin e këtyre datave urdhëroni.

z.Ekrem Rrahmani, theksoi, nuk arrita t'i shkruaj të gjitha këto data, por çka pata mundësi të mbaj në mend dhe që mu duk se kolegu z.Haki Rudari e tha që më 1 tetor të mbahet mbledhja për muajin tetor, ne e dimë që Ligji për menaxhimin e financave e obligon Kryetarin e Komunës që më datë 30 tetor të sjellë raportin 9 mujor financiar gjë që nuk ka ndodhur në vitin e kaluar dhe shpresoj se këtë Kryetari i Komunës nuk e bënë traditë që të mos e sjellë në Kuvend raportin financiar 9 mujor.

Tani nuk e di përse kolegu z.Haki Rudari i iku kësaj date kur e propozoj që të mbahet mbledhje shembull më datë 1 tetor për seancën e tetori, kurse seanca e muajit nëntor u propozua për datë 26 nëntor 2024, ndërsa Ligji i cekur e obligon Kryetarin e Komunës që deri më 30 tetor të sjellë raportin financiar 9 mujor në fund të muajit tetor. Pra kjo i bie që raporti 9 mujor financiar nuk vie fare në Kuvend.

z.Haki Rudari, theksoi, jo nuk ka problem për data i nderuar z.Ekrem Rrahmani, unë e dhashë një propozim dhe nuk e kam marrë atë në aspektin që u përmend, ndoshta duket paksa ashtu, por si hapësirë e kam marrë datën 1 tetor për hir se është 30 shtatori afati i fundit i buxhetit dhe patëm një datë diku me 1 ose 2 shtator, dhe për çdo rast nëse me 1 ose 2 shtator nuk mund ta miratojmë buxhetin, natyrisht shumica e komunave e di që këtë e bëjnë ditën e fundit dhe duke u nisur nga rregullorja që e tha z.Arjant Topanica që 7 ditë pune mund të lëviz data, para ose mbrapa, mundet ndoshta kjo mbledhja e caktuar për 1 tetor, ndoshta me 23 ose 24 shtator, pastaj mbledhja e tetorit mund të shtyhet për datën 7 ose 8 tetor, fare nuk ka të bëjë me raportin financiar për arsye se ato çka janë të parapara, jam ithtar i respektimit të planit të punës.

Kryesuesi i Kuvendit, theksoi, edhe unë një sqarim paksa, për datën e shtatorit ju e dini që së pari duhet të na vije pëlqimi prej Ministrisë përkatëse për miratimin e buxhetit, pastaj ne duhet ta bëjmë miratimin e buxhetit në Kuvend.

z.Naim Çunaku, theksoi, nuk isha tërë kohën këtu sa u diskutua për këtë pjesë dhe nuk po i jap vetës të drejtë të merrem me data tjera, por nga ajo që kuptova derisa isha prezent këtu konkretisht të mbledhja e shtatorit dhe mbledhjen e shtatorit po e shoh se është propozim data 2 shtator, por kur kemi para sysh që një prej mbledhjeve më të rëndësishme të Kuvendit të Komunës është mbledhja e miratimit të projektbuxhetit, duhet t'i kemi parasysh edhe specifikat që na obligon Ligji për financat, për atë edhe në fillim kam hezitur ta mbështes që tani të formohet dhe e pata ndër dije që mund ta kemi një komision.

Me qëllimin më të mirë po mundohem të sqaroj diçka, në bazë të Ligjit për menaxhimin e financave publike dhe përgjegjësitë, më 1 shtator Kryetari i Komunës, pas diskutimeve publike dhe pas hartimit të buxhetit, duhet t'ia dorëzoj Kuvendit të Komunës projektbuxhetin, kurrë nuk ka ndodh kjo, por Ligji e thotë kështu dhe të paktën mos të bëjmë diçka në kundërshtim me ligjin e që prej 1 shtatorit deri më 30 shtator është obligim i Kuvendit Komunal të organizon dëgjime publike dhe pastaj data e fundit e miratimit të buxhetit skadon më 30 shtator. Nëse ne sot caktojmë data me 1 dhe 2 shtator ndërsa Kryetari e dorëzon buxhetin në Kuvend, të paktën ish dashtë ta dorëzoj ashtu siç e thotë ligji po flas me 1 shtator, atëherë ne po ia shkurtojmë afatin vetit si Kuvend ose po heqim dorë nga një obligim ligjor të cilin e kam potencuar disa herë në foltore që prej 1 shtatori deri më 30 shtator është në përpunim dhe diskutim publik i kuvendarëve me publikun dhe marrja e vendimit deri në datën finale më 30 shtator. Prandaj këtu të kemi kujdes sepse kemi të bëjmë me afate ligjor edhe nuk duhet të marrim një vendim që është në kundërshtim me afatet ligjore, përndryshe mund të jetë si datë rrëshqitëse data 27 ose 28 por jo më shumë se data 27 sepse në një formë po e cungojmë një të drejtë elementare të diskutimit publik të Kuvendit me qytetarin.

z.Haki Rudari, theksoi, për atë arsye ishte edhe propozimi me datë 1 tetor dhe ashtu siç e tha kolegu z.Arjant Topanica më herët rreth atyre lëvizjeve që mund t'i bëjë Kryetari dhe Ekzekutivi, tani ajo seancë e caktuar për 1 tetor mund të vije më datë 25 apo 26 shtator, pra kjo datë mund të lëvizë. Unë e bëra propozimin, mirëpo datat mund të lëvizin, Kryetari dhe Ekzekutivi na e sjellin më 27 shtator dhe jemi në rregull apo 29 - 30 shtator dhe mund të miratohet buxheti, pra unë e lash hapësirën për me lëvizë këto data. Arsyeja pse propozova në fillim të shtatorit pak a shumë kolegëve ju thash jo zyrtarisht se ne kemi muajin gusht që është pushim dhe pastaj nëse shkojmë në fund të shtatorit besoni se po bëhen dy muaj dhe besoni që në fillim të shtatorit shumë Kuvende komunale kanë seanca, kjo është arsyeja.

z.Naim Çunaku, theksoi, me qëllimin më të mirë po sqarohemi, nuk jemi sot për të caktuar një datë dhe se qysh sot po paragjykojmë që asaj date mos t'i përmbahemi ngase kur propozojmë datën dhe lëmë mundësi rrëshqitëse në një formë ne vet nuk jemi ata që mund të bëjmë një dakordancë. Pra me qëllimin më të mirë, kur të thuash datën 2 shtator të paktën duhet të kesh diçka specifike që duhet ta lidhësh me datën 2 shtator, qoftë të kërkosh përgjegjësinë për monitorimin e ndonjë afati ligjor që ta lidhësh me atë datë, mirëpo data 2 shtator krejt çka mundem me dalë prej asaj situate që e pranoi edhe Kryesuesi i Kuvendit dhe kolegu z.Haki Rudari është shumë normale mund t'i mbajmë dy seanca, mirëpo data 2 shtator na përjashton nga një obligim ligjor që Kuvendi duhet të mbaj diskutime publike për buxhetin dhe në një formë vet vullnetarisht po hiqet dorë, madje as në plan të punës nuk e parasheh një diçka që është shkelje ligjore, prandaj në këtë kontest ishte ajo, nëse i mbajmë dy mbledhje atëherë të mbetet propozimi z.Haki Rudari që me 2 shtator dhe 30 shtator të mbahen, pastaj ajo data 30 shtator mund të lëvizë më 27 ose 28 shtator, ndërsa data 1 tetor nuk vjen në shprehje sepse me 1 tetor Qeveria pastaj ka punë me pushtetin lokal sepse kjo hiqet prej kompetencës dhe intervenon Ministria sepse pastaj zyrtari për menaxhimin e buxhetit komunal shkon me 1/12 e një viti, por të mos hyjmë në këto tema. Data 1 tetor nuk mund të kalkulohet.

Kryesuesi i Kuvendit, theksoi, ta kemi parasysh se muajin gusht gjithëherë e kemi pas muaj të pushimit përveç ndonjë rasti të mundshëm që mund të ketë ndonjë urgjencë që paraqitet për diskutim.

z.Naim Çunaku, theksoi, i nderuar Kryesues i Kuvendit, muajin gusht, është një prej të paktave komuna për të mos e vetmja që e kemi shpallë muaj pushimi. Nuk po e vërej se a është prezent këtu drejtori i DBF-së, por gushti nuk është muaj i përshtatshëm për pushim, arsyeja pse dihet, KAB, data 30 qershor, pastaj hyjmë në fazën e përgatitjes së buxhetit dhe fazën më intensive të konsultimeve publike, kurse ne i japim vetit pushim.

Kryesuesi i Kuvendit, theksoi, të jemi të sigurtë në mënyrë që të dalim mirë, data 29 shtator është ditë e diele, ne mund ta propozojmë këtë që të jetë data 27 shtator, tash mbledhja e tetorit na ka mbet në fillim të muajit.

z.Naim Çunaku, theksoi, i nderuar Kryesues, të mbesin për muajin shtator të parashikuara dy mbledhje, 2 shtator dhe 27 shtator.

Kryesuesi i Kuvendit, theksoi, tani muaji tetor po na jetë shumë afër, në qoftë se më 2 shtator mbahet mbledhja atëherë materiali dhe thirrja duhet të dërgohet 7 ditë pune më herët, prandaj ne duhet të diskutojmë dhe të dalim sa më mirë.

z.Naim Çunaku, theksoi, i nderuar Kryesues, për atë arsye në fillim e cekëm që e kemi telash caktimin e datave, kjo që t'i po e shfaq tash nuk bëjmë kurrfarë shkelje edhe nëse në muajin e pushimit e dërgojmë materialin, aty thuhet kur mbahet seanca dhe fundja është me 2 shtator por kjo mund të lëviz 5 ose 6 shtator por si orientim të jetë data 2 shtator.

z.Ekrem Rrahmani, theksoi, mendoj nëse mbahen dy seanca në muajin shtator duhet me lëviz edhe mbledhja e muajit tetor, nëse e mbajmë mbledhjen më datë 27 shtator siç e propozuat edhe për datën 2 tetor e potencova më herët që është raporti 9 mujor prandaj e them se mbledhja e tetorit duhet të jetë në fund të muajit tetor.

z.Naim Çunaku, theksoi, afatet ligjore për raportim që përcaktohen me Ligj të financave atyre ne duhet t'i përshtatemi e jo ato neve, dhe kur kemi të bëjmë me këtë raportet periodike financiare janë obligim ligjor që deri në 30 ditë pas përfundimit, do të thotë 3 mujori e ka afatin deri më 30 prill, kurse te tetori ky 7 mujori po na del keq, duhet të del ajo që e potencoi z.Ekrem Rrahmani, 27 eventualisht 30 tetor, përndryshe jemi në kundërshtim me afatet që nuk varen prej neve sepse ato janë afate të dikujt tjetër.

Kryesuesi i Kuvendit, theksoi, po i rishikojmë edhe njëherë datat e propozuara për caktimin e orarit të mbledhjeve të Kuvendit të Komunës së Podujevës për vitin 2024, pra mbledhja e muajit shkurt më datë më 29 shkurt 2024, mbledhja e muajit mars më datë 28 mars 2024, mbledhja e muajit prill më datë 30 prill 2024, mbledhja e muajit maj më datë 31 maj 2024, mbledhja e muajit qershor më datë 27 qershor 2024, mbledhja e muajit korrik më datë 30 korrik 2024, muaji Gusht pushim përveç paraqitjes së ndonjë kërkesë të veçantë për mbajtje të mbledhjes, pastaj mbledhjet e muajit shtator më 02 dhe 27 shtator 2024, mbledhja e muajit tetor më datë 28 tetor 2024, mbledhja e muajit nëntor më datë 26 nëntor 2024, dhe mbledhja e muajit dhjetor më datë 27 dhjetor 2024. Këto ishin datat e propozuara për caktimin e orarit të mbledhjeve të Kuvendit të Komunës së Podujevës për vitin 2024, nëse ndokush nga ju ka ndonjë propozim tjetër urdhëroni nëse jo atëherë shkojmë në votim këtë orar së bashku me çështjet tjera të cilat duhet bashkëngjitur në vendim.

Pas votimit, Kryesuesi i Kuvendit konstatoi se me 25 vota Për, asnjë votë Kundër, asnjë votë të Përmbajtur (të tjerët nuk votuan), me vendim miratohet caktimi i orarit të mbledhjeve të Kuvendit të Komunës së Podujevës për vitin 2024 si në vijim:

Mbledhja e muajit Shkurt më datë;.....29 shkurt 2024

Mbledhja e muajit Mars më datë;.....28 mars 2024

Mbledhja e muajit Prill më datë;.....30 prill 2024

Mbledhja e muajit Maj më datë;.....31 maj 2024

Mbledhja e muajit Qershor më datë;.....27 qershor 2024

Mbledhja e muajit Korrik më datë;.....30 korrik 2024

Muaji Gusht;..... pushim, përveç paraqitjes së ndonjë kërkesë të veçantë për mbajtje të mbledhjes.

Mbledhjet e muajit Shtator më;.....02 shtator 2024 dhe 27 shtator 2024

Mbledhja e muajit Tetor më datë;.....28 tetor 2024

Mbledhja e muajit Nëntor më datë;.....26 nëntor 2024

Mbledhja e muajit Dhjetor më datë;.....27 dhjetor 2024

Para çdo mbledhje të Kuvendit të Komunës sipas këtij vendimi, Komiteti për Politikë dhe Financa paraprakisht mban mbledhje ku shqyrton dhe rekomandon pikat e rendit të ditës.

Pavarësisht këtij vendimi, Kuvendi i Komunës mund të mbaj edhe mbledhje tjera të cilat parashihen me legjislacionin në fuqi, si mbledhje solemne, të jashtëzakonshme, urgjente dhe mbledhje tjera sipas situatave të paraqitura.

Datat e mbajtjes së mbledhjeve të Kuvendit sipas këtij vendimi, mund të lëvizin më së shumti 7 ditë para ose pas, nga planifikimet në nenin 1.

4. Të Ndryshme

z.Arjant Topanica, theksoi, kam një kërkesë nga Lagjja Mehana në fshatin Sfeçël për rregullimin e një rruge e cila ka qenë në projekt, rrugë kjo afër urës së fshatit Sfeçël, prandaj nga ana e Drejtorisë përkatëse kërkoj që kjo kërkesë të merret parasysh në afatin më të shpejt të mundshëm.

z.Ekrem Rrahmani, theksoi, trotuari përball Kafiterisë “Pranvera” përse nuk shtrohet asnjëherë, do të thotë prej pjesës së kthesës deri në gjysmë të rrugës te “Univertrade”. E di që ka probleme kontestuese, por trotuari i takon rrugës sepse qytetarët vijnë deri në atë pjesë të rrugës në trotuare kurse prej asaj pjese nuk ka trotuar, unë e di se aty ka konteste pronësore, mirëpo trotuari i takon qytetit. Më janë bërë shumë pyetje për këtë, prandaj presim shpjegim nga ana e drejtorit të DSHPMSh.

Po ashtu një lagje në fshatin Lupç kanë bërë goxha moti kërkesë për ndriçim, konkretisht fjala është për rr.”Hazir Bajgora”, pres përgjigje nga drejtori i Drejtorisë përkatëse .

z.Qëndrim Softolli, theksoi, para disa dite është mbajtur një punëtori e Kryetarit me Ekzekutivin e Komunës, edhe pse këtu nuk është Nënkryetarja e Komunës e as drejtori i DBF-së, jam kurioz ta dijtë deri ku kanë shkuar punimet e asaj punëtorie, sa ishte kostoja e asaj vizite, dhe ku i morën paratë.

z.Bahri Selimi, drejtor i DSHPMSh, theksoi, i nderuari z.Ekrem Rrahmani, trotuari te Kafiteria “Pranvera” është çështje që e kemi diskutuar gjatë dhe e kemi shqyrtuar si problem, jemi të njoftuar me atë, siç u tha edhe nga ju, është në kontest, mirëpo ne do të mundohemi që ta zgjidhim këtë problem edhe pse duhet bashkëpunim sepse është pronë e atij pronarit që mendon, andaj pa u zgjidh kontesti është problematike kjo çështje, mirëpo besoj se do e rregullojmë atë problem.

Ndriçimi publik te lagjja e Bajgorëve në fshatin Lupç, unë e di që me projektin e fundit ndriçimin publik e kemi bërë në lagjet Kaçiu dhe Bajgora si dhe në rrugën kryesore të fshatit Lupç prej shkollës deri te Lagjja e Bajgorëve lartë, andaj mos rastësisht ka qenë kërkesa për ndonjë defekt apo ka qenë kërkesë e re që do të thotë nuk është funksionale, kjo nënkupton që ka defekte, ka prishje, por tani kontratën e kemi të hapur për mirëmbajtje dhe jemi duke punuar në vazhdimësi, nëse ka kërkesa për defekte kjo nënkupton se ndriçimi është bërë por ka defekte sepse unë e di që në dy lagjet e cekura vitin e kaluar e kemi bërë ndriçimin publik dhe shumë shpejtë do ta rregullojmë këtë problem nëse kemi të bëjmë me mirëmbajtjen e tij sepse jemi duke punuar në këtë drejtim.

Meqë nuk pati të lajmëruar tjerë për të marrë fjalën, Kryesuesi e konstatoi të përfunduar këtë mbledhje.

Mbledhja përfundoi në orën 12:15

Procesverbalin e mbajti;

Enis Sheholli

Osmon Bajrami

Nr.Prot.01-060/04-0007939/24

Podujevë,

30 janar 2024

Kryesuesi i Kuvendit

Hilmi Hoxha